

կանները, երբ սկիզբ առան հայերի բռնի կաթոլիկացման ձեռնարկումները: Իսկ մինչև այդ՝ եթէ լինահայ գաղութում պատահում էին լատինադաւանութեան յարած անհատներ, նրանց ո՛չ հայ անունն էին տալիս, ո՛չ էլ անուանում էին արեւելեան ծեսով եւ կամ արեւմտեան ծեսով: Հենց Պետրովիչի կողմից վկայակոչուած լատինական այնպիսի ազդիւրներում, որոնք խօսում են Լուովի հայերի դործերի մասին, գեռեւս ժ՛ր դարի երկրորդ կէտում հայ ասելով հասկանում էին միայն հայադաւաններին. այդ ազդիւրների ընձեռած փաստերի հիման վրայ Պետրովիչն ինքը, մի այլ առիթով, գտնում էր, որ «կաթոլիկեայ տերմինը դարձել էր լատին-ի համանիշ. իսկ հայ տերմինն՝ իմաստով նոյն էր դարձել ներձուածող տերմինի հետ», եւ մարդիկ այդ անում էին, ինչպէս եզրակացնում է նոյն Պետրովիչը, «յաճախ չփոխելով տարբեր ծէսերը տարբեր դաւանանքների հետ»²⁰:

Բայց թողնենք Պետրովիչի մտեցման եղանակների հարցը: Մասնագէտներին յայտնի է, որ լատինական ազդիւրներն Armeni ritus orientalis (արեւելեան ծեսով հայեր) կամ պարզապէս Armeni orientales (արեւելեան հայեր) անուանումով միշտ հասկանում են հայադաւան հայերին, որոնց ի տարբերութիւն, լատինադաւաններին անուանում են Armeni uniti (միացեալ հայեր). եւ այդպէս էլ ընդհանրացած է եւրոպական պատմագիտութեան մէջ, ինչպէս տեսնում ենք, օրինակ, հետեւեալ աշխատութեան վերնագրում. D. Dan, «Die orientalischen Armenier in der Bukowina», Czernowitz, 1890²¹: Այս գիրքը նուիրուած է Բուկովինայի հայադաւան հայերի ուսումնասիրմանը:

Գուցէ անհրաժեշտ է նաեւ յիշել, որ այսպիսի խնդիրներում Հռոմէական Եկեղեցու տեսանկիւնից կայ նաեւ կանոնականութեան հարց: «Կաթոլիկեայ հանրագիտարան»-ում, օրինակ, մկրտութեան հարցերին նուիրուած յօդուածը բացայայտօրէն ասում է, որ արեւելեան եկեղեցիների մատակարարած մկրտութիւններն անպայման վաւերական են եւ կրկնելի չեն²²: Նոյն հանրագիտարանի մի ուրիշ յօդուածում, ուր «քրիստոնէական Արեւելք» հասկացութիւնն է պարզաբանուում, ասում է, որ արեւելեան եկեղեցիներից էին Բիւզանդականը եւ նրանից ծագած եկեղեցիները, ի թիւս որոնց՝ սլաւոնականը (ուսներ, ուկրաինացիներ եւ այլն)²³, որոնց բոլորին յունադաւան էին անուանում:

Արդ՝ որքանով կարելի է հաւատալի համարել, թէ «եռանդուն կաթոլիկէ» Ստեփանոս Սալմաստեցին, Հռոմէական Եկեղեցուն ծառայութիւն մատուցելու համար, սանակոխ անէր նրա ունեցած կանոնական կարգերը, այն էլ հենց նոյն եկեղեցու բացարձակ իշխանութեան սահմաններում գանուող Լեհաստանում: Եթէ որեւէ մէկը ուզենար կաթոլիկ դարձնել այդ ազաներին՝ մկրտութեան հարց արգէն չկար յունադաւանների համար: Մեզ թուում է, որ բուական է այսքանը:

Այսպիսով՝ անտարակուսելի է, որ Սալմաստեցին, լինելով հայոց կաթոլիկոս, փորձ էր կատարել յունադաւան ուկրաինացի երեխաներին հայադաւան հայ դարձնելու եւ ոչ թէ, որպէս լատինական եկեղեցու գործիչ, նրանց կաթոլիկ դարձնելու՝ ինչպէս ներկայացնում է Պետրովիչը՝ օգտուելով «Լուովի դատական վճիռների ժողովածու»-ն կազմողի ազդեալար կատարած սխալից:

²⁰ PChA p. 16.

²¹ Այս գիրքը թարգմանուած է հայերէն. Գեմետրիոս Տան (Դան), «Արեւելեան Հայք ի Պուրովինա» (Թարգմ. Հ. Գրիգորիս Գալեմքեարեան), Վիեննա, 1891:

²² «Enciclopedia Cattolica», vol. II, Città del Vaticano, 1949, p. 1045.

²³ Ibidem, vol. IX, 1952, p. 309-310.